

Dithero tsa Tirelano mo Kutlwanong

55/2014 Ka Sontaga o o latolang o o latolang wa bofelo morago ga moletlo wa Modimo o o Borarobongwe, e le ka 09. 11. 2014

MO LEINENG LA MODIMO O E LENG RARA LE MORWA LE MOWA O O BOITSHEPO!

Lefoko le le okamelang beke eno le kwadilwe mo go 2 Bakor. 6:2b, le re: **"Bonang ha, jaanong ke nako ya go ka amogelwa sentle; bonang, jaanong ke letsatsi la pholoso!"**

1. Sefela sa 315 - 290/296

2. Thapelo: Rara yo o mo legodimong, re a go leboga, ka o re naya phatlha gore re kopane mono, re go tumise, Motlhodi wa legodimo le lefatshe. Re a kopa gore o tshegofatse go kopana ga rona mono mo leineng la gago, re femelwe ke wena, Morena, mo thateng ya ga Satane, le mo go tse di lekang go re kgaoganya le wena, Morena. Re kopela lefatshe lotlhe kagiso, le merafe yotlhe gore e go galaletse, Morena wa barena. O nne le rona, Morena yo o Borarobongwe, re gogwe ke wena mo tirelong ya kajeno. Re kopa mo go wena thata gore re go galaletse ka metlha ka go ikokobeletsa Lefoko la gago. Re di kopa mo leineng la Morena wa rona Jesu Keresete. Amen.

3. Lefoko la Testamente e kgologolo le kwadilwe mo go Jobe 14:1-6;

Epistolo ka fa thulaganyong ya 2 e kwadilwe mo go Baroma 14:7-9;

Efangele ka fa thulaganyong ya 1 e kwadilwe mo go Luka 17:20-30.

4. A go ipolelwe tumelo ya bokeresete!

5. Sefela sa 316 - 291/297

6. Thapelo ya mmadi wa thero.

7. Epistolo ka fa thulaganyong ya 6 e kwadilwe mo go 1 Bathesalonika 5:1-11, e re: "Jaanong, bakaulengwe, ga go batlege gore lo kwalelwe ka ga dipaka le dinako; gonne lona ka losi lo itse sentle gore letsatsi la Morena le tla tla fela jaaka legodu bosigo.

Gonne e tla re go twe: 'Go kagiso le polokego!' ke gona tshenyego e tla ba welang ka tshoganyetso, jaaka ditlhabi di wela mosadi yo moimana, mme ga ba kitla ba falola. Mme lona, bakaulengwe, ga lo mo lefifing, mo letsatsi leo le ka lo welang jaaka legodu. Nyaya, lona lotlhe lo bana ba lesedi le bana ba letsatsi; ga re ba bosigo le e seng ba lefifi. Ka moo he a re se robaleng jaaka ba bangwe, mme a re nneng re thantse, re nne tekano; gonne ba ba robetseng ba robetse bosigo, le ba ba tagilweng ba tagilwe bosigo. Mme rona ba re leng ba letsatsi, a re nneng tekano, re apere sefemela-sehuba sa tumelo le sa lorato, le tsholofelo ya phologo go nna kuane ya phemelo. Gonne Modimo ga o a re beela bogale, mme o re beetse go bona phologo ka Morena wa rona Jesu Keresete yo o re swetseng gore le fa re tsogile gongwe re robetse, re tshele mmogo nae. Ka moo gomotsanyang lo agane jaaka lo ntse lo dira." Amen.

8. Thero: Baratwa mo Moreneng wa rona Jesu Keresete, Lefoko la thero ya kajeno le bua ka ga letsatsi le Morena Jesu a tla tlang ka lona jaaka legodu, go sa itse motho gore o tla tla leng. Re gopola jalo ka metlha, fa re ipolela tumelo ya bokeresete, re re: "O tla boa teng go athola batshedi le baswi." Kana Jesu o tla boa ka letsatsi la katlholo le le sa itsiweng ke motho. Lefoko le utlwala sentle gore ka go itse le go bona ga rona rona batho re re: Go na le kagiso le polokego, mme pono e ya rona e ka khutlisiwa fela, le fa ka nako efe.

Lefoko le tiisa ba ba dumelang mo go Jesu gore le fa letsatsi leo le tla, ga re na go gakgamala fela, fa re ntse re letetse go boa ga Morena Jesu. Bana ba lesedi ba ntse mo leseding le e leng Morena Jesu. Ke gore ba lefifi ba ntse mo lefifing. Lefoko le re: A re fitlhelweng re ipaakantse, re lete, gonne letsatsi leo le tla tla ka tshoganyetso, le fa e le leng. Ga go na yo o itseng gore legodu le tlasela leng. Ba ba robetseng ba robetse bosigo, ba ba tagilweng, ba tagilwe bosigo. Lefoko le kgothatsa bana ba lesedi gore ba nne ba sa fofala mo tshologanyong, mme ba itse sentle gore tumelo e e pholosang e bonala mo go Jesu Keresete fela. Kagiso e e sa khutleng e bonala mo go ene yo o neng a swela maleo a lefatshe. Kgang e kgolo ke yona tota e e reng: Bana ba lesedi ba femetswe ka tumelo e e theilweng mo lefikeng le e leng Jesu Keresete. Tsotlhe di ntse mo loratong le mo phemelong ya boikanyo jwa pholoso eo. Lefoko le lebisa mo go tseo, go a utlwala gore Modimo ga o a re neelang mo katlholong le mo bogaleng jwa ona, mme o re abetse pholoso ka ene Jesu Keresete, Morwaona, yo o neng a swela maleo a rona gore re tshele mo go ene.

Lefoko la thero ya kajeno le re sedimosetsa kgang e e reng: Re kile re le bana ba lefifi, mme Modimo o re bileditse mo leseding ka Lefoko la ona. Seo ga se diragale ka thata ya motho, le e seng ka botlhale jwa lefatshe, mme se diragala ka bopelotlhomogi jwa Modimo fela. Se diragala ka Jesu. Lefoko le re: Ke ene lesedi le le sedimosetsang merafe yotlhe, jaaka re buisa mo go Jesaya 42, le mo go Luka 2. Lesedi le kagiso ya lefatshe ke tsa sebakanyana fela, mme tsa ga Keresete ga di khutle. Lefoko la Morena le kgothatsa phuthego gore e tshwaragane, e thusanye mo tumelong. Ke se se tiisang lorato lwa botsalano lo lo godimo ga Keresete Morepholosi. Ke ene lesedi la lefatshe.

Bangwe ba setse ba boleletswe kgale gore Morena o tla boa, mme ga ba re sepe ka tseo. A re gopoleng gore Morena o dira tsa gagwe ka nako ya gagwe. Re tshwanetse go itse gore le rona re kile ra nna ka fa tlase ga lefifi, ra tsamaya mo ditirong tsa lefatshe tse di fapaanang le thato ya Modimo. Lokwalo go Baefeso 2:1-10 lo baya kgang sentle, fa re ne re sule ka ditlolo tsa rona le maleo a re kileng ra bo ra tsamaya mo go ona, mme Modimo ka bopelotlhomogi jwa ona o re dirile gore re tshele ka Jesu Keresete. Re tshwanetse go gopola gore ba re kileng ra tsamaya mo lefifing, Efangele e re bileditse mo leseding ka Mowa o o Boitshepo. Re gopola thaloso ya Artikele ya boraro malebana le kgang ya gore ga re ka ke ra dumela mo go Jesu Keresete kwa ntle ga pitso le botsalo jo bošwa ka Mowa o o Boitshepo ka tlhapo ya botsalo jo bošwa mo metsing ya kolobetso.

Re ka lebala jang gore go na le tse dintsi tse di re tagisang, tse re di itseng, tse di lekanang go re kgaoganya le tumelo, re tlogele go direla Morena. Go sa dumele mo go Keresete ke sengwe sa dilo tse di fifatsang ditlhaloganyo tsa batho, gonne ke se se dirang gore ba gogiwe ke tsa lefatshe. Lefoko la kajeno le a tiisa gore go a batlega gore re tsamaye mo leseding le e leng Keresete, re tloge mo lefifing. Batho ba bantsi jang ba ba lapileng mo go maswe ka ntlha ya kgaogo ya thata ya motlakase ka nako e e sa lebelelwang! Re ne re akantse ka tse di tla senyegang, fa go se na motlakase. Bosigo, batho ba bo boifa ka ntlha ya lefifi. A re tseeng kgaogo ya thata ya motlakase, re e tshwantshe le kgang ya kajeno gore go maswe go kanakang, fa re ka bo re sa phologa mo tsamaong ya lefifi kwa ntle ga Keresete. Kana Jesu ke lesedi le le sedimosetsang dipelo tsa rona, go tlosiwe maleo a lefatshe. Kwa ntle ga tumelo mo go Keresete re ka bo re timetse fela mo lefifing le le sa khutleng.

A re tlhokomeleng gore Lefoko la kajeno le a kgothatsa gore re nne re ipaakantse go mo letela. Go diragala, fa re kopa mo Modimong gore o re tiise mo tumelong, o re abele go itshwarelela mo go ona, go ya mo bokhutlong. Go diragala, fa ka metlha re o galaletsa Modimo, e bong Rara, le Morwa, mmogo le Mowa o o Boitshepo. Go a diragala, fa re utlwa Lefoko la ona ka metlha, le go itshwarelwa mo leineng la ona, le go amogela mmele le madi a ga Jesu Keresete, fa re tsamaya ka fa thatong ya ona, re ikokobeletsa Lefoko la ona. Ga re na thata ka borona go nna re ipaakantse go mo letela go boa ga Keresete, mme re tshwanetse go gogwe, le go tiisiwa ke Mowa o o Boitshepo o o re gogang ka fa tsholofetsong ya ga Keresete mo go tseo Jesu a di boleletseng barutwa ba gagwe. Ga re ka ke ra bona pholoso ka ditiro tsa rona, ke ka go dumela mo go Keresete le tse re di baakanyeditweng ke ene ka loso le tsogo ya gagwe. Le fa go ntse jalo mo lefatsheng go le molemo, gongwe go le maswe, re tshwanetse go leba mo go Keresete, Mosimolodi le Mofetsi wa tumelo ya nnete, yo o fetseng loso le thata ya boleo. Ka fa lefokong la thero ya kajeno a re kaelananeng ka Lefoko gore re se ka ra tshega, le e seng go tthatlhoba maleo a ba bangwe, le e seng go lebala, fa tsa lefatshe di tagisa batho ka pele. Kana Lefoko la Modimo le re kgothatsa ka gore tlihabologo le boitshwaelo jwa maleo di rerelwa merafe yotlhe mo leineng la ga Keresete. Re bileditswe gore re tsamaye mo leseding ka ntlha ya tiro ya ga Keresete mo sefapaanong, re pholositswe ka bopelotlhomogi jwa Modimo. Ka moo re bana ba lesedi ka go dumela mo go Keresete. Amen.

9. **Thapelo:** Morena, re lebogela phatlha e o e re fileng, e seng ya go dira ga rona, mme e le ya go direlwa ke wena. Re a kopa gore o tiise tumelo e o e re abetseng, re femelwe ke wena mo thateng ya ga Satane yo o lehang ka metlha go re busetsa mo lefifing. O re fe thata gore re thusanye mo tirong ya gago, re se ikgodise, mme re godise leina la gago fela. Re kope tseo mo leineng la Morena Jesu Keresete. Amen. Thapelo ya Morena: Rara wa rona yo o mo legodimong ...

10. Sefela sa 325 - 300/308

A kagiso ya Modimo e e fetang tlihaloganyo yotlhe e boloke dipelo tsa rona le maikutlo a rona mo go Keresete Jesu, Morena, Morepholosi. Amen.

Thero eno e kwadilwe ke E. S. Sithole, ka ngwaga wa 2008/ 2014

Kgatiso le go rongwa ga dithero tseo go tshegediwa ke kopano e e bidiwang The Lutheran Heritage Foundation.

